

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva finansija, Vlada Zeničko-dobojskog kantona, na 22. sjednici, održanoj dana 02.06.2023. godine, d o n o s i

ZAKLJUČAK

I.

Utvrđuje se Prijedlog Zakona o izmjenama Zakona o izvršavanju Budžeta Zeničko-dobojskog kantona za 2023. godinu.

II.

Prijedlog Zakona o izmjenama Zakona o izvršavanju Budžeta Zeničko-dobojskog kantona za 2023. godinu upućuje se u dalju skupštinsku proceduru po skraćenom postupku.

III.

Zaključak stupa na snagu danom donošenja.

PREMIJER

Amra Mehmedić

Broj: 02-_____/23
Datum, 02.06.2023. godine
Z e n i c a

DOSTAVLJENO:

1x Ministarstvo finansija,
1x Stručna služba Skupštine,
1x a/a.

**Z A K O N
O IZMJENAMA ZAKONA O IZVRŠAVANJU BUDŽETA
ZENIČKO-DOBOJSKOG KANTONA ZA 2023. GODINU**

PRIJEDLOG

Na osnovu člana 37. stav 1. tačka f) i g) Ustava Zeničko-dobojskog kantona, Skupština Zeničko-dobojskog kantona, na ____sjednici, održanoj dana _____ donosi

Z A K O N **O IZMJENAMA ZAKONA O IZVRŠAVANJU BUDŽETA** **ZENIČKO-DOBOJSKOG KANTONA ZA 2023. GODINU**

Član 1.

(Izmjena člana 11. Zakona)

U Zakonu o izvršavanju Budžeta Zeničko-dobojskog kantona za 2023. godinu ("Službene novine Zeničko-dobojskog kantona", broj: 3/23), u članu 11. stav (2) riječi "uz saglasnost Vlade Kantona" se brišu.

Član 2.

(Izmjena člana 12. Zakona)

U članu 12. riječi "najkasnije do 30. u tekućem mjesecu", zamjenjuju se riječima "najkasnije do 25. u tekućem mjesecu".

Član 3.

(Izmjena člana 18. stav (1) Zakona)

U članu 18. stav (1), mijenja se i glasi:

"(1) Obračun plaća policijskih službenika Zeničko-dobojskog kantona za budžetsku 2023. godinu, utvrđuje se Kolektivnim ugovorom i Sporazumom između Vlade Zeničko-dobojskog kantona i reprezentativnog Sindikata policije Ministarstva unutrašnjih poslova Zeničko-dobojskog kantona i drugim važećim propisima kojima se regulišu plaće policijskih službenika Zeničko-dobojskog kantona."

Član 4.

(Izmjena člana 18. stav (3) Zakona)

U članu 18. stav (3), mijenja se i glasi:

"(3) Visina osnovice za obračun plaće za zaposlene u kantonalnim organima državne službe i drugim budžetskim korisnicima Zeničko-dobojskog kantona, na koje se primjenjuje Zakon o plaćama i naknadama u organima vlasti Zeničko-dobojskog kantona („Službene novine Zeničko-dobojskog kantona“, broj: 1/18, 10/19, 11/19 - isp. i 8/22), za budžetsku 2023. godinu, za period od 01.01.2023. do 31.05.2023. godine, utvrđuje se u iznosu od 330,00 KM, te se utvrđuje bod 1,0 za obračun plaće, a za period od 01.06.2023. do 31.12.2023. godine visina osnovice za obračun plaće utvrđuje se u iznosu od 330,00 KM, te se utvrđuje bod 1,15 za obračun plaće."

Član 5.

(Izmjena člana 37. stav (5) Zakona)

U članu 37. u stavu (5) riječi „Tekući transfer udruženjima”, koristit će se prema aktima koje donosi Vlada Kantona”, zamjenjuju se riječima „Tekući transfer udruženjima”, koristit će se prema programu utroška koje donosi Vlada Kantona, a nadležno ministarstvo je dužno nakon donošenja programa utroška raspisati javni poziv koji ne može biti otvoren duže od 60 dana.”

Član 6.

(Stupanje na snagu)

Zakon stupa na snagu narednog dana od dana objavljivanja u “Službenim novinama Zeničko-dobojskog kantona”.

Broj:

PREDSJEDAVAJUĆI

Datum,

Z e n i c a

Dejan Kovačević

O B R A Z L O Ž E N J E

I USTAVNI OSNOV

Ustavni osnov za donošenje ovog zakona sadržan je u članu 37. stav 1. tačka f) i g) Ustava Zeničko-dobojskog kantona.

II RAZLOZI ZA DONOŠENJE I OBRAZLOŽENJE PRAVNIH RJEŠENJA

Članom 7. stav 2. Zakona o budžetima u Federaciji Bosne i Hercegovine („Službene novine Federacije Bosne i Hercegovine“, broj: 102/13, 9/14-isp., 13/14, 8/15, 91/15, 102/15, 104/16, 5/18, 11/19, 99/19 i 25a/22) je propisano da se zbog potrebe bližeg uređivanja načina izvršavanja Budžeta za tekuću fiskalnu godinu, donosi Zakon o izvršavanju budžeta kojim se definiše struktura prihoda, primitaka, te rashoda i izdataka budžeta i njegovo izvršavanje, prava i obaveze korisnika budžetskih sredstava, ovlaštenja Vlade, Ministarstva finansija i Ministra finansija u izvršavanju budžeta za tekuću godinu i ostala pitanja bitna za izvršenje Budžeta.

Skupština Zeničko-dobojskog kantona je donijela Budžet Zeničko-dobojskog kantona za 2023. godinu i Zakon o izvršavanju Budžeta Zeničko-dobojskog kantona za 2023. godinu („Službene novine Zeničko-dobojskog kantona“, broj: 3/23).

Imajući u vidu potpisane Sporazume između Vlade Zeničko-dobojskog kantona i Samostalnog sindikata državnih službenika i namještenika u organima državne službe, sudskoj vlasti i javnim ustanovama u Federaciji BiH i reprezentativnog Sindikata policije Ministarstva unutrašnjih poslova Zeničko-dobojskog kantona o visini osnovice i boda za obračun plaće, te prijedloge pojedinih budžetskih korisnika za izmjene Zakona, ukazala se potreba za odgovarajuće izmjene Zakona o izvršavanju Budžeta Zeničko-dobojskog kantona za 2023. godinu.

S tim u vezi, pripremljen je Prijedlog Zakona o izmjenama Zakona o izvršavanju Budžeta Zeničko-dobojskog kantona za 2023. godinu.

U članu 1. Prijedloga Zakona vrši se usklađivanje člana 11. stav (2) Zakona o izvršavanju Budžeta Zeničko-dobojskog kantona za 2023. godinu („Službene novine Zeničko-dobojskog kantona“, broj: 3/23), sa odredbama člana 8. stav (2) i člana 14. istog Zakona, te sa odredbama člana 57. stav 2. Zakona o budžetima u Federaciji Bosne i Hercegovine („Službene novine Federacije Bosne i Hercegovine“, broj: 102/13, 9/14-isp., 13/14, 8/15, 91/15, 102/15, 104/16, 5/18, 11/19, 99/19 i 25a/22), kojima je propisano da rashodi svakog budžetskog korisnika ne mogu prelaziti iznose alociranih budžetskih sredstava odobrenih za svaki mjesec, osim uz saglasnost Ministarstva finansija.

U članu 2. Prijedloga Zakona vrši se usklađivanje roka navedenog u članu 12. Zakona o izvršavanju Budžeta Zeničko-dobojskog kantona za 2023. godinu, za dostavljanje Ministarstvu finansija prijedloga mjesečnih i kvartalnih operativnih planova izvršenja Budžeta od strane budžetskih korisnika, odnosno nadležnih ministarstava za budžetske korisnike, sa 30. u tekućem mjesecu za naredni mjesec, na 25. u tekućem mjesecu za naredni mjesec, a radi blagovremenog odobravanja operativnih planova budžetskih korisnika od strane Ministarstva finansija Zeničko-dobojskog kantona.

Na osnovu Sporazuma između Vlade Zeničko-dobojskog kantona i reprezentativnog Sindikata policije Ministarstva unutrašnjih poslova Zeničko-dobojskog kantona, broj: 02-11-8652/23 od 26.05.2023. godine, u članu 3. Prijedloga Zakona vrši se izmjena člana 18. stav (1) Zakona o izvršavanju Budžeta Zeničko-dobojskog kantona za 2023. godinu, na način da se obračun plaća policijskih službenika Zeničko-dobojskog kantona za budžetsku 2023. godinu, utvrđuje se Kolektivnim ugovorom i Sporazumom između Vlade Zeničko-dobojskog kantona i reprezentativnog Sindikata policije Ministarstva unutrašnjih poslova Zeničko-dobojskog kantona i drugim važećim propisima kojima se regulišu plaće policijskih službenika Zeničko-dobojskog kantona.

Na osnovu Sporazuma između Vlade Zeničko-dobojskog kantona i Samostalnog sindikata državnih službenika i namještenika u organima državne službe, sudskoj vlasti i javnim ustanovama u Federaciji BiH, broj: 02-11-8653/23 od 29.05.2023. godine, kojim je dogovoreno da osnovica za obračun plaće za period od 01.06.2023. godine do 31.12.2023. godine iznosi 330 KM i vrijednost boda 1,15, u članu 4. Prijedloga Zakona vrši se izmjena člana 18. stav (3) Zakona o izvršavanju Budžeta Zeničko-dobojskog kantona za 2023. godinu, na način da se visina osnovice za obračun plaća za zaposlene u kantonalnim organima državne službe i drugim budžetskim korisnicima Zeničko-dobojskog kantona, na koje se primjenjuje Zakon o plaćama i naknadama u organima vlasti Zeničko-dobojskog kantona („Službene novine Zeničko-dobojskog kantona“, broj: 1/18, 10/19, 11/19 - isp. i 8/22), za budžetsku 2023. godinu, za period od 01.01.2023. do 31.05.2023. godine, utvrđuje u iznosu od 330,00 KM, te se utvrđuje bod 1,0 za obračun plaće, a za period od 01.06.2023. do 31.12.2023. godine visina osnovice za obračun plaće utvrđuje se u iznosu od 330,00 KM, te se utvrđuje bod 1,15 za obračun plaće.

U članu 5. Prijedloga Zakona vrši se izmjena člana 37. stav (5) Zakona o izvršavanju Budžeta Zeničko-dobojskog kantona za 2023. godinu, na osnovu prijedloga Ministarstva za poljoprivredu, šumarstvo i vodoprivredu Zeničko-dobojskog kantona, navedenog u aktu broj: 05-03-01/11-11179-4/22 od 26.01.2023. godine, a u skladu sa preporukom Stručnih savjetnika - internih revizora Ministarstva finansija Zeničko-dobojskog kantona, na način da se „Tekući tranfer udruženjima“, umjesto prema aktima koje donosi Vlada Kantona, koristi prema programu utroška koje donosi Vlada Kantona, s tim da je nadležno ministarstvo dužno nakon donošenja programa utroška raspisati i javni poziv.

U skladu sa članom 140. Poslovnika Skupštine Zeničko-dobojskog kantona – Treći prečišćeni tekst („Službene novine Zeničko-dobojskog kantona“, broj: 14/18, 18/18- Isp., 7/19 i 7/20), predlaže se upućivanje Prijedloga Zakona o izmjenama Zakona o izvršavanju Budžeta Zeničko-dobojskog kantona za 2023. godinu u skupštinsku proceduru po skraćenom postupku, u formi prijedloga, zbog toga što nije u pitanju složen i obiman zakon.

III FINANSIJSKI EFEKTI

Za donošenje Prijedloga Zakona o izmjenama Zakona o izvršavanju Budžeta Zeničko-dobojskog kantona za 2023. godinu finansijska sredstva su sadržana u Budžetu Zeničko-dobojskog kantona za 2023. godinu.